

Die Polizei dein Freund ond Helfer hani dänkt för me  
ond dromm em Novämber scho e Vermesstazeig ufgeh  
jetz hani de Bscheid Sie heige gsuecht vo Chur bes nach Gänf onde  
doch leider heige Sie au niene euses Fasnachtsmotto gfonde

Em Johr 1994 do wot om Hemmelswelle  
de Papst emmer no nüt wösse vo Kondom ond Pelle  
ich begriff das ned eso ganz Johannes Paul los sorry  
glaubsch du wörklech emmer no de Storch bringt d`Chender Storry

Heschen gseh 72 en Sapporo ond met Staatsmänner diskotiere  
be de S-Plus Eröffnig heschen gseh ond met em Nicollier telefoniere  
ond wen de Dölf Ogi ned besser luegt de gsämeren ofzmole  
em RTL Notruf no wesen onder de Lawine förehole

Was söll de Seich met der Tagesschau wot jetz chasch dopplet gseh  
do zeigeds em DRS en Brecht vo de Cessna em Bodensee  
ond e Halbstonnd spöter of S-Plus do lang ich mer an Grend  
gesch das Sie be de Ermettliche no emmer glichwyt send

Em Tennis phauptet de Boris Becker wärd Doping au konsumiert  
drom heig er halt s`letschte Johr au mol so es Mettel probiert  
de Saft heig sportlech zwar nüt brocht kein Turniersieg ond kein Orde  
doch emmerhin sig er demet jetz stolze Vater worde

Em 92. brecht em Vreni de Stock d`Chantal macht Omfall mues heireise  
jetze d`Chantal weder verletzt em Heinzer müends d`Schiebendig schweisse  
also wen das jetz de ned ändli hört met dere Olympiapächsträne  
den mues ich halt so leids mer tuet e 4 Johr för d`Östricher fäne

Eusi Kläralag die chonnt ewäg de Bach düemmer renaturiere  
d`Flora ond d`Fauna sölle weder chönne floriere  
jo wen mer denne euse Dräck of Vellige exportiere  
no chonnt de secher äscho gliie d`Greenpeace cho demonstriere

Ob Tornfahrt oder Jugendfescht Velo-Gv Gmeschtchorobe  
be de Terminplanige chan ich eus Riniker ned lobe  
s`wörd me dromm nömm verwondere s`wörd me nömm irritiere  
wen e de Sommerferie d`Schuel tät s`Schielager doreführe

Wen mer scho kei rächti Dächer wänd so tuen ich druf tendiere  
das mer s`Flachdach vo de Tornhalle gar ned tüend saniere  
ond wens det den ineseicht an alle Egge ond Ände  
den chömmer si scho gli emol als Hallebad verwände

Wenterferie em Februar Sommerferie em Juli  
s`ganz Johr Mendig ond Zischtig frey ich ärgere me schuli  
ond öber d`Festtag die halbi Zyt chasch au ned goge mampfe  
deför müends den em räscht vom Johr e de Tannegg s`dopplet chrampfe

Be de Ammeöbergab fahred eusi Gmeindsbosse  
e de Gegend omenand enere Luxusstaatskarosse  
elei du nor scho vo dem Gäld wos Bänzin het koschtet  
hätsech de Hueber Werni doch e nagelneus Rennvelo poschtet

162 Maa bruchts do löpfts mer d`Galle  
om em Schänkebärgertal 1 Weldsou abezknalle  
jo do esch den Träfferquote han ich usegfonde  
scho wessentlech höher bem Kandelaber z`Umike onde

*Der Komedi<sup>94</sup>*

Wänd er me bsueche? Ich be dehei onder „[www.komedi.ch](http://www.komedi.ch)“